

F A C T V M,

Pour les Religieuses, Prieure & Conuent de Noëfort, transferées au Faux-bourg S. Nicolas de Meaux, Appellantes aux perils & fortunes de leurs garends, Intimées, Demandereffes en Sommation, & Defendereffes en Lettres.

(p. 26)

Contre Maistre Nicolas Duchemin, Aduocat en la Cour & consors, enfans de defuncts Maistre Estienne Duchemin, aussi Aduocat en la Cour, & Magdeleine Nicolas, leurs pere & mere, soy disans heritiers seulement de ladite Nicolas, au lieu de laquelle ils ont repris le procès; & auoir renoncé à la succession dudit Duchemin, à laquelle ils ont fait créer vn Curateur; & icelle Nicolas de son viuant, à la Communauté dudit defunct & d'elle, Appellans, Defendeurs en Sommation, & Demandeurs en Lettres.

Et les Creanciers, Intimez, & Interuenans, Demandeurs en declaration d'hypothèque.



L'sagit au procès, d'un Contract passé en cette Ville de Paris, le 24. Ianuier 1629. entre defuncts Maistre Estienne Duchemin, Aduocat en la Cour, & Magdeleine Nicolas sa femme, d'une part; Et lesdites Religieuses, agissans par Maistre Martin Rocheron leur Confesseur, porteur de leur Procuration, d'autre: Par lequel lesdits Duchemin & sa femme, ont vendu ausdites Religieuses vne Maison & jardin qu'ils auoient au Faux-bourg Saint Nicolas de Meaux, du propre & acquest dudit Duchemin, moyennant la somme de 5500. liures, le decret à la main. Lequel Decret, les vendeurs s'obligent de fournir dans six mois; & cependant permis ausdites Religieuses d'entrer dans ladite maison pour s'y habiter. Le prix fut tout payé comptant, à la reserve de la somme de cent liures, retenuë pour estre deliurée en baillant le Decret; & est porté par ledit Contract que des cinq mil quatre cens liures payées par lesdites Religieuses, lesdits Duchemin & sa femme en ont touché la moitié, se montant à 2700. liures, & que l'autre moitié a esté consignée es mains du sieur Corbinelly Docteur en Medecine, par eux choisy, & de la solubilité duquel, ils demeureroient responsables, en attendant ledit Decret.

Suiuant ce Contract, lesdites Religieuses sont entrées dans la maison, & l'ont accommodée pour estre propre à leur profession, ny pouuans pas habiter autrement. Elles ont mis les lieux en estat, qui manquoient de toute sorte de reparations, fait bastir vne Eglise, sur les anciens murs d'une grange, fait faire des Dortoirs, des Parloirs, des Cellules, fait refaire les couuertures & planchers, mesmes les murailles tout à neuf, & de hauteur conuenable à la Closture qui est de leur vœu.

Cependant lesdits Duchemin & sa femme qui auoient l'argent desdites Religieuses, & qui ne craignoient plus la cheute de leur Maison, se mettoient fort peu en peine de leur fournir le Decret. Il est vray pourtant qu'ils auoient commencé de le faire passer au Chastelet: mais aussi est il certain, que Louise du Tertre, vefue Maistre Claude Bordereau, & Louis Bordereau son fils, s'estans opposez pour raison d'une rente de 77. liures vn sols huit deniers, ils laisserent tout là, & ne firent aucun progrès.

Lesdites Religieuses ne tourmentoient pas pour cela lesdits Duchemin & sa femme, & n'employèrent que des ciuilitéez pour auoir ce Decret, jusques à ce que ladite vefue Bordereau & son fils, voyans que le Decret n'aduançoit point, intentèrent vne action contr'elles en declaration d'hypothèque, en l'année 1635. qu'elles furent obligées de sommer & denoncer ausdits Duchemin & sa femme, qui firent renuoyer la Cause aux Requestes du Palais, où tant l'Instance principale intentée en Declaration d'hypothèque.

A



2

que, que l'Opposition au Decret, faite au Chastelet, furent enoquées par Sentences des 13. Juillet 1635 & 4. May 1636. Et enfin Sentence diffinitive le 23. Septembre ensuiuant, sur l'Appel de laquelle il eschet de pronocer. Par laquelle, la Maison & lieux acquis par lesdites Religieuses de Maistre Estienne Duchemin & sa femme par Contrat du 24. Ianuier 1629. sont declarez affectez, obligés & hypotheez au paiement & continuation de 77. liures 1. s. 8. d. de rente duee ausdites Du Tertre & Bordereau, par lesdits Duchemin & sa femme, ce faisant condamné lesdites Religieuses comme detentereffes desdits lieux, passer titre nouuel & reconnoissance de ladite rente, en payer les arrerages deus & escheuz & qui escherront cy-apres, discussion prealablement faite des biens dudit Maistre Estienne Duchemin, avec depens.

Et sans auoir egard aux offres desdits Duchemin & sa femme, de payer & rachepier letiers de ladite rente, & de passer Titre nouuel & reconnoissance de la totalite d'icelle : Comme aussi sans auoir esgard à la main-leuee par eux requise, ils sont condamnez fournir ausdites Religieuses le Decret desdits lieux dans 4. mois pour toutes prefxions & delaiz, & condamnez es despens enuers lesdites Religieuses, tant en demandant, defendant, que de la sommation.

De cette Sentence, Appel par lesdits Duchemin & sa femme, & par lesdites Religieuses à leurs perils & fortunes. Pendant l'instruction duquel, suruiennent d'autres nouveaux demandeurs en declaration d'hypothee; sçauoir est, Louys Beauquesne Procureur à Meaux, & Marie Duchemin sa femme, sœur dudit Maistre Estienne Duchemin : Ce qui donna sujet à vne nouvelle Sommation desdites Religieuses contre lesdits Duchemin & sa femme : Lesquels d'autre part s'estans broüillez l'un avec l'autre, par quelque jalousie de ladite Nicolas, qui demanda la separation contre ledit Duchemin dont elle fut deboutée par Sentence & par Arrest, suiuant l'aduis de ses propres freres, beaux-freres & proches Parens : Cela luy donna lieu pourtant, de demander, en qualite d'autorisée à la poursuite deses droicts, d'interuenir pour deduire ses raisons separément. Apres cela, ell' obtint Lettres en Chancellerie le 12. Février 1638. pour estre restituée contre l'obligation où ell' estoit entrée avec son mary, par le Contrat de vente du 24. Ianuier 1629. comme fait par force, excez & menaces dudit Duchemin son mary; & donnoit pour commencement de preuue, le Procès en separation, & l'Enqueste qu'ell' auoit faite en iceluy contre sondit mary, qu'elle disoit l'auoir mal-traitée pour parler en ce Contrat, où elle disoit n'auoir point d'interest, puisque c'estoit le bien de son mary qui estoit vendu, non pas le sien.

L'instruction de cet Incident & autres qui suruiurent par le decez dudit Maistre Estienne Duchemin, dura iusques à la fin de l'année 1643. que le Procès estant sur le Bureau, ladite Nicolas qui sçauoit pleurer & se contrefaire pour tromper les Iuges, s'advisa d'articuler de nouveaux faits malicieusement inuentez & posez par vne Requête de Saluations du 6. Juillet audit an 1643. sçauoir est, qu'il y auoit lezion audit Contrat d'outre-moitié de juste prix; & de fait, que dès auparauant il en auoit esté offert 15000. l. & que le seul bois d'un pressoir auoit esté vendu par lesdites Religieuses 2000. l. Laquelle Requête ayant esté méprisée par lesdites Religieuses & avec raison, non seulement parce que ces faits estoient proposez à tard, & sans apparence : Mais parce qu'il n'y auoit point de Lettres d'Ampliation de Rescision fondées là dessus. Neantmoins, la Cour s'estant reseruee la liberte entiere d'opiner en diffinitive, rendit son Arrest interlocutoire, qui fut daté du 7. Septembre audit an 1643. Par lequel, *Auant faire droit tant sur le Procès par escrit qu'instances.* Ordonné que dans quinzaine apres la signification dudit Arrest à personne ou domicile, ladite Nicolas articulera plus amplement les faits de force & lezion contenus esdites Lettres & Requête, qui seront communiquez ausdites Religieuses pour y respondre à la huietaine ensuiuant : Informeront d'iceux au mois, & lesdites Religieuses au contraire si bon leur semble; & que les lieux dont est question seront veuz, prisez & estimez, eu esgard au temps du Contrat du 24. Ianuier 1629. par Experts dont les parties conuiendront pardeuant le Bailly de Meaux, ou son Lieutenant; autrement en sera par luy pris ou nommé d'office; Ecriront & produiront lesdites parties, bailleront Contredits & Saluations dans le temps de l'Ordonnance; Pour ce fait & rapporté leur estre fait droit, despens reseruez.

EN EXECVTION de cet Arrest, ladite Nicolas articula ses Faits de lezion d'outre-moitié de juste prix, & ne parla plus de fore ny de violence; qui estoit le seul fait articulé

dans les dix ans du Contract, & sur lequel sont fondées les Lettres de Rescision, qui ne contiennent mot de lezion, non pas seulement de bon marché. Elle fit ainsi succeder vne imposture évidente, à vne calomnie manifeste. Ledites Religieuses articulèrent leurs Faits contraires. Et la difference qui s'est trouvée entre les deux parties est, Que lesdites Religieuses ont pleinement informé & verifié pardevant Monsieur Palluau Conseiller en la Cour qui se transporta sur les lieux, ceux qu'elles ont posez & mis en avant; Et ladite Nicolas au contraire y a renoncé par Requête formelle, parce qu'il luy estoit impossible de trouver témoignage de ses mensonges.

Son recours fut d'vser de ruse pour la visitation, qu'ell' eut le credit d'éluder de degré en degré, & d'Arrest en Arrest. La face des lieux estoit absolument changée depuis seize années. Et l'on changea aussi peu à peu les termes de l'Arrest interlocutoire, pour faire faire cette visitation & prise par des Experts de Paris; l'un desquels nommé Pierre Marie ayant fait vn faux Rapport d'une chose qu'il n'avoit point veüe, & en ayant tout à fait mal vû, parce qu'il ne fist que semblant de se faire instruire de l'estat des lieux au temps du Contract; & ayant voulu faire croire des choses contre verité, mesmes faisant parler lesdites Religieuses dans son Rapport, qu'elles n'avoient veu ny signé, faisant le Juge au lieu de Masson, disant qu'il avoit ouy & enquis des tesmoins qui luy avoient depose verité sur l'estat des lieux, comme ils estoient en Janvier 1629. Lesquels n'ont pareillement point signé, & qui au contraire l'ont desavoué par escrit: Ledites Religieuses se sont inscrites en faux contre ledit Rapport. Les Moyens en ont esté fournis; & quand ils ne passeroient que pour des Moyens de nullité, ils sont beaucoup plus que suffisans pour le détruire: mais il seroit importun de les rapporter icy, veu qu'ils sont de trop longue discussion.

Et apres tout, quand ce Rapport seroit bon, sur le pied duquel, & avec toute la tromperie desdits Duchemin, Amelot nommé d'office par la Cour, a estimé les lieux valloir huit mil liu. La cause desdits Duchemin ne vaudroit encore rien du tout: parce qu'il n'y auroit pas lezion d'outre moitié de juste prix, articulée & necessaire pour releuer les majeurs d'un Contract de vente volontaire. Ledit Duchemin ont cité, mesmes rapporté par leurs Intendits, le texte vulgaire de la Loy 2. *Cod. de rescind. vend. si nec dimidia pars veri pretij soluta sit.* Ledites Religieuses ne sont pas dans l'espece: Le prix du Contract est de cinq mil cinq cens liu. Il faudroit donc que la vraye valeur & estimation fust de quelque chose au dessus d'unze mil liures; cela est hors de difficulté. Donc vray de dire que lesdites Religieuses ont exuberance de droit.

I. Elles ont traité de bonne foy par Procureur en cette ville de Paris, avec vn ancien Aduocat de la Cour & sa femme, qui ont touché leurs deniers; Les femmes en ce Royaume sont capables de s'obliger avec leurs Marys, lors qu'elles sont bien & deuëment autorisées. Ladite Nicolas n'a point esté forcée ny violente; L'on a suffisamment confessé la calomnie, quand on a renoncé de faire preuve du fait force, articulé par malice; & lesdites Religieuses ont fait voir par l'Examen de l'Enqueste, que ladite defuncte Nicolas fist faire en l'Instance de separation d'avec son Mary depuis ce Procez, que *iamais elle n'a fait plainte ny protestation quelconque pour raison de ce*, non pas mesmes dans leurs rixes arriüées depuis ce Procès meü, ny pour quelque autre obligation que ce soit, parce que ledit defunct Duchemin estoit homme entendu, qui n'a iamais fait en sa vie vn mauvais marché. C'est pourquoy elle fut deboutée de la separation, par Sentence & par Arrest, suivant l'Aduis de ses propres freres & beaux-freres.

II. Ladite Nicolas a fondé ses Lettres de rescision sur ce principe, que le bien n'estoit pas à elle, mais à son mary. Cela est vray; & ce n'est pas vne matiere de vice en son obligation. Mais cela nous aduertist, que le propriétaire vendeur principal, ne s'estant iamais plaint du contract, la couenderesse qui n'a aucun droit de propriété dans le fonds, ne le scauroit reuendiquer sous pretexte de lezion, parce que c'est vn droit de propriétaire. C'est vne reprise du fonds en rendant le prix & les impenses, & l'acheteur a la faculté de supplier l'outre moitié. Ce qui ne peut iamais regarder que l'ancien propriétaire. Les Loix du tiltre de *rescindenda vend.* ne parlent que du propriétaire.

Et quand ladite Nicolas ou ses enfans obiectent qu'en qualité de creanciere pour ses conuentions matrimoniales, elle peut intenter cette Action, double responce.

La premiere, qu'elle ne l'a point intentée. Ses Lettres sont obtenues du vivant du Mary, esquelles il n'y a mot de creance, ny de demande, comme creanciere: Au contraire, le motif des Lettres, est, que ladite Nicolas n'auoit point d'interest en la vente; & iamais il n'y a eu de Reformation de cette demande, sur laquelle il eschet de prononcer; Iamais de demande en qualité de creanciere, ny de iustification de cette qualité.

La seconde, qu'il ne compete aux creanciers, que l'Action hypothecaire, laquelle donne seulement *ius ad rem*, non pas *ius in re*; & tout le surplus des droicts des creanciers estans bornez par le Titte du droict: *Quæ in fraudem creditorum facta sunt vtrouocentur*. Ladite Nicolas ayant signé au contract avec son mary, qui n'a iamais reclamé contre iceluy, & du chef duquel il n'y a point encores aujourd'huy de Lettres, il faut qu'elle se renferme & demeure bornée dedans le fait de force par elle articulé, pour sçauoir si ell' a esté violentée de signer ledit Contract, comme ell' a supposé par ses Lettres.

III. Ladite Nicolas est tenuë du fait de son defunct mary, en sorte que quand elle n'auoit point parlé dans le Contract, & quand son obligation particuliere seroit ostée d'iceluy, elle seroit obligée de le faire valoir, par la raison de la Communauté, à laquelle elle n'a iamais valablement renoncé: Car l'Art. 237. de la nouuelle Coustume de Paris, qui accorde la faculté à la femme tant noble que roturiere, de renoncer à la Communauté, contre le droict commun & l'ancienne pratique, est vn Priuilege, qui ne s'accorde que sous condition de rapporter vn bon & loyal Inuentaie, & les Articles suiuaus veulent qu'il soit bien & deuëment clos avec legitime cōtradicteur. Tout cela ne se trouue point fait; On n'a iamais veu d'Inuentaie; Et il n'y pouuoit auoir de legitime contradicteur que lescdites Religieuses, puisque les enfans ont renoncé la Succession, comme ils disent; & que cela s'est fait depuis ce Procez. Il n'y a rien si aisé que de renoncer, quand on a tout pris & tout pillé, quel'on a taillé & rongné sans Contredit de personne, comme bon a semblé.

IV. Le fait de force & violence, premierement articulé, estant calomnieux, qui est pourtant le seul moyen des Lettres obtenues en Chancellerie, & n'ayant seruy qu'à tromper la Cour, parce que apres son Arrest interlocutoire, on ne l'a plus ozé mettre en fait par les Intendits, ny en faire preuue; & le fait de lezion n'ayant point esté articulé dans les dix ans de l'Ordonnance, ny Lettres d'ampliation obtenues pour raison de ce: mais seulement par vne simple Requeste de Saluations, lors que le Procez estoit sur le Bureau, & dans le desespoir d'vne meschante Cause, le 6. Iuillet 1643. quatorze ans & demy apres le Contract: Lescdites Religieuses soustiennent que tel fait n'est point à considerer; & d'autant moins que l'on a renoncé à faire preuue du fait articulé par les Lettres, & des faits singuliers portez par ladite Requeste pour raison de l'offre pretendue faite de quinze mil liu. de la maison dont il s'agit, & de la vente d'vn pressoir pour la somme de deux mil liures. Tous faits inuentez à plaisir. Et la Cour est dans la liberté entiere d'opiner, d'autant plus qu'il se voit à present, que toute la conduite & la procedure de ladite Nicolas, a esté artificieuse & captieuse.

V. Il est certain, par l'Enqueste que lescdites Religieuses ont faite pardeuant Monsieur Palluan, composée de témoignages de Gens d'honneur & sans reproche, comme par toutes les circonstances du Procès, que lescdites Religieuses ont achepté ladite Maison plus qu'elle ne valoit; & qu'ell'a esté long-temps à vendre sans que l'on s'en pust défaire; qu'ell'a esté laissée à plusieurs personnes à meilleur marché que lescdites Religieuses ne l'ont eue; & enfin que jamais personne n'en a tant offert qu'elles en ont baillé. Iamais elle n'a valu de loyer plus haut que cent dix li. Le bail est produit; Surquoy il falloit faire quantité de Reparations; & y a vne grande partie du jardin, qui n'estoit qu'vne emphytheose de l'Abbaye de Saint Pharon, dont il ne restoit que peu d'années. Cette maison prouenoit de la succession des pere & mere dudit deffunct Maistre Estienne Duchemin, dont il s'accommoda presque pour rien, avec ses coheritiers peu de iours auparauant que de faire le contract dont il s'agit, voyant que lescdites Religieuses en offroient si bonne somme; & vne circonstance qui est remarquable est, que le contract fait avec ses coheritiers pour se rendre Maistre du total, par lequel il s'obligea de faire leuer à la Chambre quelques souffrances de Comptes anciens du Domaine, pour ladite Maison qui ne luy a ainsi cousté qu'vn peu de diligence, est intermediaire à la Procuration des-

5

dites Religieuses, passée à Maître Martin Rocheron leur Confesseur, & au contract qui fut fait en vertu d'icelle, & dont est question. Aussi pendant que le Procès a duré, & depuis le 24. Janvier 1629. iusques au 6. Iuillet 1643. il ne se trouuera pas que iamais, ny par ledit Duchemin, ny par ladite Nicolas, il ait esté aduancé *un seul mot de lesion, ny mesmes de bon marché* en l'acquisition dont il s'agit: Au contraire ils ont fait des offres iudiciaires, repetées & soustenuës, & contre lesquelles il n'y a point de Lettres. Et si la face des lieux n'eust point esté absolument changée au mois de Iuillet 1643. iamais cette imposture ne fust venuë dans l'esprit de ladite Nicolas & de ses enfans qui la conduisoient.

V I. Toutes les considerations cy-dessus ostées du Procez, quand il faudroit croire le faux Rapport de Marie, & l'estimation faite sur iceluy par Amelot, & qu'il y auroit autant d'ingenuité, qu'il y a de malice, & d'artifice en tout cela, il n'y a point de lesion d'oultre moitié à juste prix. Le Contract estant fait pour le prix & somme de cinq mil cinq cens liures, & l'estimation à huit mil liures, il est ridicule, sauf correction de fonder la dessus vne Restitution de majeur: Car posé que ce soit le juste prix de l'heritage, il a esté achepté plus de quatre mil liures par lesdites Religieuses. Donc il n'y a pas de lesion: C'est la disposition formelle de la Loy 8. *Cod. de resc. vend. Hoc enim solum quod paulo minore pretio fundum venditum significas, ad rescindendam venditionem, inualidum est: neque enim bona fides (que emptionis atque venditionis conuentionem tuetur) pati potest, neque vlla ratio concedit, rescindi propter hoc finitum contractum, nisi minus dimidia iusti pretij quod fuerat tempore venditionis, datum esset, electione iam emptori prestita seruanda.* Il y a encores plusieurs autres textes semblables; Et autrement il n'y auroit jamais de Contract d'acquisition qui fust asseuré. Achepter à bon prix, est vne prudence œconomique, quand on le peut faire. Mais en ce rencontre, toutes ces circonstances du Procès, & les Depositions d'un grand nombre d'honnestes Gens de la Ville de Meaux, enseignent à la Cour, que lesdites Religieuses n'ont jamais eu occasion de se resjouir de leur bon marché; Au contraire elles ont achepté plus cher que personne; La rente du prix actuellement payé, valoit trois fois le loyer; Voires quatre fois, à cause des Reparations qui le diminuoient souuent, & d'un emphyteose qu'il a fallu rachepter à grands fraiz & faueur. Enfin il se peut dire, qu'il n'y eut jamais vne Cause plus déplorable en toutes ses circonstances, que celle desdits Duchemin, lesquels ne laissent pas d'auoir des confiances merueilleuses, & des esperances qui les tromperont, parce qu'elles ne sont pas legitimes. Leur vexation est trop excessiue pour estre traitée avec indulgence, au dommage d'autrui.

A V R E S T E, ils pretendent auoir payé les debtes des creanciers: Si cela est, à la bonne heure. Le decret en sera plus prompt & facile à fournir: Mais cela ne fait pas qu'ils ayent receu Grief en la Sentence. Et il n'y a point de desistemens desdits Creanciers, ny d'Arrests passez, non pas mesmes de Quitances rapportées, comme elles seroient absolument necessaires pour la seurété desdites Religieuses, tant pour le principal, interests, que despens. A quoy la Cour prendra garde, s'il luy plaist, par sa prudence.

Monsieur DV LAVRENS, Rapporteur.



